

Date – 26/06/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma hovin State Disaster Management Authority te chu CM Conference Hall-ah an thukhawm.
2. Chief Minister Pu Lalduhoma chuan ruihhlo zuar ru hria chu report zel tur leh an phu tawk hremna hmu ngei zel se a duh thu a sawi.
3. Revenue Minister Pu B. Lalchhanzova'n Revenue department chu Mizoramin ama puala sum a hmuh theihna 'state own resource' pawimawh tak a nih thu a sawi.
4. Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 135-na tur a ni ang.

<><><>

STATE DISASTER MANAGEMENT

Chief Minister Pu Lalduhoma hovin State Disaster Management Authority te chu CM Conference Hall-ah an thukhawm.

Nimina thutkhawmah hian Kum 2021 - 2025 chhunga khuarel chhiatna avanga Mizoramin thil a hlohte chipchiara chhutna (PDNA) report pek a ni a. PDNA tarlan danin chhiatna thlentu lian zualte chu Cyclone Remal te, African Swine Fever te, ruah sur nasa leh leimin nasa te, kum 2025 kuma hmun thenkhata Sazu puangte an ni.

Kha kum chhunga Mizoram hloh (total damages) zat hi cheng vaibelchhe 656.76 niin an chhut a, Economic Loss hi cheng vaibelchhe 634.35 hu a thlen ni a chhut niin, a siam that leh vekna atan cheng vaibelchhe 879.82 a tul niin a chhut a ni.

Thutkhawmah hian thu pawimawh hrang hrang ngaihtuah a ni bawk a, he hunah hian Home Minister Pu K. Sapdanga, PWD Minister Pu Vanlalhlana bakah minister dang Pi Lalrinpuui, Pu B. Lalchhanzova, Pu F. Rodinglana leh Prof Lalnilawma te an tel a ni.



INTERNATIONAL DAY AGAINST DRUG ABUSE & ILLICIT TRAFFICKING

Chief Minister Pu Lalduhoma chuan ruihhlo zuar ru hria chu report zel tur leh an phu tawk hremna hmu ngei zel se a duh thu a sawi.

Nimina Social Welfare, Women & Child Development department buatsaih International Day against Drug Abuse & Illicit Trafficking puala Dawrpui Multipurpose Hall, Aizawla hun hman a telpuinaah he thu hi Chief Minister chuan a sawi a.

Chief Minister chuan Sorkar, tlawmngaipawl leh kohhran hoten theihtawp an chhuah tih sawiin supply lam ringawt danchah tum lovin, demand lam tihtawp pawh an tum tih a sawi a. Security Coordination Committee din a nih thu leh Ruihhlo Do Core Committee an tihnun thar leh thu a sawi a. YMA ten kumpuanah Ruihhlo Do puangin Anti-Drugs Squad an kalpui thu leh chhun-zan zawmin hma an la a ti a. Kohhran hrang hrangte thawhpuiah an sawm tih sawiin zirlai naupangte zingah awareness an kalpui thu leh media campaign a kal reng thu a sawi a. Ruihhlo laka ram venhim, ruihhlo bawiha tang lo tura thangtharte hnena zirtirte chu hna pawimawh ber a nih thu a sawi a ni.

He hunah hian Social Welfare, Women & Child Development Minister Pi Lalrinpuui pawhin zirlai kalkhawm te chu fuihin ram hmalam hun tur an ni tih inhria a, ruihhlo that loh zia hria a, ram leh hnam, chhungkua chhanchhuak turin ruihhlo ti ve chhin lova, rilru fim tak pu chungah mahni chhungkua, ram leh hnam tana ruihhlo laka fihlim zel a, mahni awm hmunah theuh ruihhlo lo do zel turin a chah a ni. Mizorama Excise & Narcotics in ruihhlo lo lut an man zat an chhinchhiah danah kum 2024 atanga kumin June thleng khan ruihhlo Kg 3,820 leh Gram 578 an man tawh a, a hlut zawng hi Vbc 486 Nuai 90 leh 148 a ni tawh a ni.

International Day against Drug Abuse & Illicit Trafficking pual hian district hrang hrangah pawh hun hman a ni.

VB-G RAM G

Rural Development Minister Prof. Lalnilawma chuan VB-G RAM G chu July thla atanga hman tan tur a nih avangin, Mizoram puma MGNREGA staff te inpekna thar nen thahnemngai taka an thawh a tul thu a sawi.

Nimina Vanapa hall, Aizawla All Mizoram MGNREGA Staff Federation General Assembly Vawi 4-na a hmanpuinaah he thu hi Minister chuan a sawi a. Minister chuan VB-G RAM G in a tum angin, kum 2047 ah India ram chu kawng engkimah ram hmasawn a nih theihna turin, thingtlang khua ah pawh tun atanga kum 20 hnuah chuan hmasawna tluantling a awm theihna turin, an theihna zawn theuhah hma la tlang zel turin kalkhawm te a sawm a ni.



RASHTRIYA GRAM SWARAJ ABHIYAN

Rashtriya Gram Swaraj Abhiyan (RGSA) hnuaiah nimin khan Kolasib Bawrhsap Pu H. Dolianbuaia hoin Kolasib district chhunga VC thlanchhuahte hnenah computer set sem a ni.

Bawrhsap chuan tunlai khawvel changkang zelah thiamna thar leh technology hmanga khawtlang inawpna leh rorelna kalpui chu thil tul tak a ni, a ti a. Sawrkar laipuiin RGSA kaltlanga tualchhung rorelna, Village Council te tihchak a tum chu a lawmawm hle tih sawiin heng computer an dawnte hi khawtlang hmasawna tur leh mipuite tana awlsam zawka hna thawh nan hmang turin a chah a ni.

Tun tumah hian Kolasib District chhunga Village Council pasarih (7) te hnenah computer set hi sem a ni a. Heng computer dawngtu khuate hi Buhchangphai, Kolasib Venglai, North Chaltlang-I, Phainuam, Rengtekawn, Saihapui 'V' leh Vairengte-II te an ni.



REVENUE MINISTER

Revenue Minister Pu B. Lalchhanzova'n Revenue department chu Mizoramin ama puala sum a hmuh theihna 'state own resource' pawimawh tak a nih thu a sawi.

Land Revenue & Settlement department hnathawh thlirletna hun, niminaFolkland Park Conference Room, Aizawla a hmanpuinaah he thu hi Minister chuan a sawi a. Minister chuan mipuite'n Mizoram state in ama puala sum a thawhchhuah pawimawhna an hrethiam chho zel tih a sawi a. Kum kal taa Stamps & Registration bakah Land Tax leh Non-Tax atanga Department sum laklul pawh Vaibelchhe 40 nuai 23 a tling chho ta mek tih a sawi a. A pung chho tha hle tih sawiin heng sum te hi Mizoram Sawrkar ta liau liau, state mamawha hman tur a ni, a ti a. Minister chuan Ram hlutna chhutna (Land Valuation) mumal nei turin MZU Economics Dept te thiamna hman tangkai mek a nih thu a sawi a. Tax pe lo te chhuichhuah leh umzui hna pawh online tax payment 2.0 hmangin chak taka enzui mek a ni, a ti.



SAMVIDHAN HATYA DIWAS

BJP Mizoram President Dr. K. Beichhua chuan India ram danpui palzut ni champha, Samvidhan Hatya Diwas chu democracy ram ropui India ram history-ah chuan hun tha lo tak, hun duhawm lo hriatrengna a nih thu a sawi.

Nimina India ram danpui palzut ni champha, Samvidhan Hatya Diwas puala BJP pisa, Mipui Run, Aizawla hun an hmannaah Akashvani News zawhna chhangin he thu hi sawiin BJP President chuan a sawi a. India ram danpui palzutna chu India ramah thleng tawh lo se tih chu a duhdan a nih thu a sawi a. An party chuan an lak thutak thu sawiin kumtin he ni hi 'black day' anga hmangin urhsun taka an hman thin thu a sawi a. Dr. K. Beichhua chuan India ram chu democracy ram ropui tak, hnam hrang hrang leh chi hrang hrang culture leh tradition te pawh hrang hrang awmna a nih thu sawiin fimkhur taka political party zawng zawngte pawhin ram an kaihhruaia a tul thu a sawi.

June ni 25, 1975-a Pi Indira Gandhi rorelna hnuaiah National Emergency puan hian khua leh tui te dikna chanvo Fundamental Rights tihtawp a ni a, he ni hi India danpui tihhlumna ni - Constitution Murder Day tih hiala sawi thin a ni a. Nimina Samvidhan Hatya Diwas puala hun hmana thusawitu Dr. Zonuntluanga chuan tuna Prime Minister Pu Narendra Modi chu a hunlaia tangkai tak , India danpui palzut duhloa bei tu a nih thu a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 135-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.



WORLD CUP

Football inelna lian leh ngaihhlut FIFA World Cup chu khelh chhonzawm zel a ni a, nizan khan Round of 32 lut chiang tawh Germany chu Ecuador lakah goal hnih goal khatin an chak lo.

Tukin khan Group F ten an group match hnukung ber an khel a, Netherlands chuan Tunisia chu goal thum goal khat in an hneh a, match thum an khelh tawhah Dutch team hi an chak kim vek. Inkhel dangah Japan leh Sweden te chu goal khat ve ve khungin an inhnehtawk bawk.

Group F atangin Netherlands bakah Japan leh Sweden te hian knockout round an lut chiang tawh. Sweden hi Group F-ah pathumna ni mah se, group hmahruaitu leh pahnihna bakah pathumna zinga a ti tha zual ram pariat an tlang dawn a, hemi atang hian an tlang dawn tih a chiang tawh a ni.

